

Nakon 12 dana u UKC Tuzla preminuo mladić kome je u Gradačcu drvo palo na glavu

Na Odjelu intenzivne njege Klinike za neurohirurgiju UKC Tuzla, večeras oko 19 sati preminuo je Vedad Jašarević (20), mladić kome je 7. jula, tokom nevremena u Gradačcu, na glavu palo drvo i teško ga povrijedilo.

Vedad Jašarević (Foto sa facebook profila)

Nesreća se dogodila dok se Jašarević kretao šetalištem iza OŠ Ivan Goran Kovačić. Uslijedilo je olujno nevrijeme, vjetar je oborio drvo koje je oborilo Vedada Jašarevića.

Vozač saniteta Doma zdravlja u Gradačcu nije mogao doći do onesviještenog mladića zbog rampi postavljenih radi spora između OŠ Ivan Goran Kovačić, Gradačaćkog sajma i preduzeća "Parkinzi" d.o.o. Gradačac.

Kako je objavljeno na www.gradacac.com, na ovom dijelu postavljene su rampe prema površini, tako da je u prvom momentu nesreće bilo nemoguće pružiti prvu pomoć Jašareviću.

Pružena mu je tek kada je vozač sanitetskog vozila fizički uklonio barikadu kako bi pristupio mjestu nesreće.

Reporter portal Tuzlive.ba, igrom slučaja, svjedočili su velikoj ljubavi i nadanju rodbine i povelike skupine djevojaka i mladića iz Gradačca, koji su, nakon što je Vedad smješten na Odjel intenzivne njege, svakog dana, obično u popodnevnim satima, dolazili u UKC raspitujući se za njegovo zdravstveno stanje.

– Želimo biti blizu i podržati ga u njegovoj borbi za život – govorili su, dok su u suterenu Plave bolnice, palili cigarete, tiho pričali i osluškivali vijesti iz bolnice.

Nekad od mladićevog oca, nekad od osoblja klinike.

I tako svakog od minulih 12 dana kome njihovog prijatelja. Vjerovali su, nadali su se.

Jučer se proširila vijest da Vedad povremeno, nakratko, otvara oči i da daje signale vlastite borbe za život. No, ostao je i dalje u teškoj komi.

I danas su, negdje oko 17 sati, prijatelji počeli da se okupljaju u suterenu, tamo gdje pacijenti i osoblje bolnice, između betonskih zidova, silaze da ispuše cigaretu ili popiju kafu iz automata.

Čekali su nove vijesti, puni nade i želje da njihove misli i energija ljubavi izvuku prijatelja iz „zone sumraka“.

Negdje oko 19 sati, nastao je tajac. Tišina, jecaji, suze i nevjerica popratili su ugaslu nadu, nakon što je javljeno da je Vedad izgubio životnu bitku.

Gorko su plakali svi, od rodbine do prijatelja i pacijenata bolnice. Svi, u stvari, koji su svo vrijeme, na katu klinike ili u suterenu, preživljavali tragediju nastralog mladića, svi koji su bez izuzetka vjerovali da će se, unatoč svemu, Vedad izvući.

Oko 19 sati nada se ugasila. Fatum je, ovoga puta, dobio bitku sa životom. Nažalost. (tl)

Date: 19-07-2017